



## MEMORIA XUSTIFICATIVA E ECONÓMICA DO CONVENIO DE COLABORACIÓN ENTRE A CONSELLERÍA DE MEDIO RURAL DA XUNTA DE GALICIA E INDUSTRIA DE DISEÑO TEXTIL S.A. (INDITEX)

A Consellería do Medio Rural, conforme o disposto no Decreto 223/2022, do 22 de decembro, polo que se establece a estrutura orgánica da Consellería do Medio Rural, é o departamento encargado de xestionar as competencias inherentes ás medidas de prevención e defensa contra os incendios forestais, de acordo co establecido no Estatuto de Autonomía de Galicia, no seu artigo 27, apartado 10, que dispón que lle corresponde á Comunidade Autónoma galega a competencia exclusiva en materia de montes, aproveitamentos forestais e naturais, sen prexuízo do disposto no artigo 149.1.23 da Constitución española.

A Consellería de Medio Rural puxo en marcha un plan de restauración ambiental (en adiante Plan de Restauración) que asegure a resiliencia do territorio galego ante os incendios forestais que, durante o ano 2022 afectaron a grandes áreas forestais de Galicia e que tiveron un impacto moi significativo tanto dende o punto de vista social como medioambiental. Este Plan de Restauración propón unha acción integral no territorio galego que contribúa á reforestación e a recuperación da actividade agrogandeira. Este Plan financiarase a través de dotacións do sector público e tamén do sector privado, mediante a creación dun fondo específico no que as entidades privadas que se atopan interesadas poidan realizar aportacións económicas.

INDITEX entende o investimento na comunidade como unha oportunidade para contribuír ao desenvolvemento da sociedade e ó coidado do planeta, especialmente nas áreas xeográficas onde desenvolve a súa actividade.

A cultura empresarial de INDITEX aséntase nunha serie de principios e valores de sustentabilidade social e medioambiental tales como a diversidade, a integración, a tolerancia, a non discriminación, a ética, o uso racional dos recursos naturais, o respecto á biodiversidade, a defensa do medio ambiente, ou a loita contra o cambio climático que se atopan recollidos no seus códigos de conducta e na súa política de dereitos humanos e de sustentabilidade.

Así, en liña co seu compromiso de redución de impactos medioambientais en todas as súas operacións, comezou en 2021 a cobrar as bolsas e sobres de papel reciclado que entrega a os seus clientes en tenda. O importe íntegro equivalente invístese en iniciativas medioambientais e sociais, a través da colaboración en diversas organizacións sociais e medioambientais, co fin de potenciar proxectos que





promovan a protección e restauración dos ecosistemas , que axuden a previr a súa degradación, que poñan en valor o coñecemento e a súa comprensión ou que avancen na utilización de técnicas de produción rexenerativa.

INDITEX está interesada en colaborar coa Consellería de Medio Rural na promoción do Plan de Restauración, a través dunha aportación económica derivada de parte dos ingresos xerados mediante o cobro de bolsas e sobres de papel reciclado na súas tendas , que permita financiar previstas no Plan de Restauración da Consellería e que contribúa, en definitiva, a promover a protección e restauración do ecosistema galego, en liña cos compromisos recollidos na política de sustentabilidade do grupo INDITEX .

Para formalizar esta colaboración a Consellería de Medio Rural e INDITEX van asinar un convenio que ten como obxecto regular a aportación económica a título gratuito de INDITEX ao Plan de Restauración para contribuír á implementación de medidas que promovan a resiliencia do territorio galego ante posibles incendios, así como a protección e a restauración do ecosistema galego, en liña cos compromisos de INDITEX en materia medioambiental.

Conforme ao obxecto do convenio INDITEX comprométese a aportar a título gratuito, durante un período de tres anos, a cantidade económica máxima de nove millóns de euros ( 9.000.000 euros) a favor da Consellería de Medio Rural, a fin de que sexa destinada á realización das actuacións de interese xeral previstas no Plan de Restauración que se describen no anexo do convenio. A aportación económica referida realizarase mediante transferencia a unha conta bancaria de titularidade da Xunta de Galicia de acordo co seguinte calendario:

- Maio 2023 3.000.000 Euros
- Maio 2024 3.000.000 Euros
- Maio 2025 3.000.000 Euros

O convenio entrará en vigor na data da súa formalización e terá unha duración de 4 anos . Este prazo enténdese sen prexuízo do disposto en relación co calendario de desembolsos da aportación por parte de INDITEX. Ademais o convenio poderá ser prorrogado , por acordo das partes, por un período de outros catro anos.

Este convenio está sometido ao dereito privado, considerado desde o punto de vista da normativa aplicable á administración autonómica como un negocio patrimonial, de acordo co artigo 9.2 da Lei 9/2017, de 8 de novembro, de Contratos do Sector Público e o artigo 46.3 da Lei 5/2011, de 30 de setembro, do Patrimonio da Comunidade Autónoma de Galicia.





De conformidade con todo o indicado anteriormente e a fin de dar cumprimento ao preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión de outras figuras .

Santiago de Compostela, na data da sinatura dixital

O secretario xeral técnico

Nicolás Vázquez Iglesias

